



Jumat, 31 Juli 2021
Ogen: Kuan-kuanen 11:14



Dame Me Negeri



Dame me negeri, enda sada harapan ras pertoton kerina bangsa. Ketedeheh ateta kerina eme kedamen, emaka lit tertulis bas undang-undang negaranta pe nina, 'penjajahan di atas dunia harus di hapuskan' si e nurikensa perluna perdamen ras kedamen i doni enda.

Uga maka banci perdamen e tercipta i bas sada bangsa entah negara? Rikutken ogenta sendah adi enterem kalak si beluh mereken ukur ngerunggui negeri. Kalak si beluh i bas bahasa Indonesina penasehat, eme si mabai negeri e ku si mehuli. Kalak beluh, ietehna apai payo ras si la payo, ietehna apai mehuli ras si la mehuli, ietehna bujur ras la bujur, janah i bas muat keputusan arihkenna lebe ras kalak si erpengalaman, iergakenna temanna sada dahin, seh maka la salah i bas muat keputusan. Kalak beluh lit lalap hubungenna ras Tuhan. Hubungan si mehuli ras Tuhan e mabai bana perukuren ras perbahanenna empeturah kemalemen ate ras perdamen. Ibegikenna rusur sora Tuhan erkusik i bas pusuhna.

Mbelin pengarapen man banta kerina gelah tetap erpersukutem man Tuhan, lit komunikasi si mehuli ras Tuhan, janah si bereken ukurta guna ngerunggui bangsa i ja kita tading. Arah kita bertindak bujur, tulus, nggit erkorban, la sibahani si la lit, e pe kita enggo erjuang nciptaken perdamen i sekelewetta. Bageme gambaren kalak beluh, labo rikutken ukuren doni, si nilaina arus meganjang, pemetehna lebih asa pemeteh kalak si deban, ngasup ngaturken masyarakat sekelewetna. Kalak beluh e meteruk ukurna, nggit arah lebe erbahan si mehuli, pemetehna ipakena ngerunggui alu bujur, kai si lit i bas ia e irasraskenna guna kiniulin sekelewetna. Kalak beluh e la ngukuri dirina jine, meriah akapna di kune sekelewetna e kerina nggeluh dame, ras e tetap jadi perjuangenna.